

Disponibil ancje un gnûf manuâl pal studi de lenghe e de culture

## ARLeF e SFF a screin i cors di furlan on line

I cors di furlan si fasin su la rê. La ativitât di formazion che di tancj agns incà e je ufierte sul teritori de Societât Filologjiche Furlane, cu la poie de Agenzie Regionâl pe Lenghe Furlane, intal 2021 si propon intune forme gnove par garantî continuitât ancje in tims di pandemie.

I cors a son a disposizion a gratis par ducj chei che a vuelin aprofondî la cognossince de lenghe ma ancje de storie dal teritori. «Il cors al da lis primis basis di gramatiche par inressi la cognossince e l'ûs de lenghe, e par mantignî la braûre di jessi furlans», **al à marcât l'Assessor regionâl, Pierpaolo Roberti**, te ocasion de conference stampe di presentazion de iniziative. «Une gnove proposte formative che e je la ocasion par indreçâsi a di un public plui larc», **al à precisât il president de ARLeF, Eros Cisilino**, e che e definîs «l'impegn comun e la continuitât di azion che a animin di simpri sedi la Societât Filologjiche che la ARLeF», **al à comentât il president de SFF, Federico Vicario**. I cors si fasaran su lis platformis Moodle e Zoom. A son in program



10 leziions asincronis su Moodle, là che ogni setemane al sarà publicât materiâl gnûf, che al restarà simpri a disposizion. Lis leziions a favorissin la riflessione, il studi in autonomie e

a son peadis ai trê incuintris sincrons, ognidun di une ore cirche, che si fasaran su Zoom par sciariments e confronts. Par informaziions si pues scrivi a [formazione@filologicafriulana.it](mailto:formazione@filologicafriulana.it)



A supuart de gnove ativitât formative al è stât realizât il prin volum de golaine „Lenghe e culture“. Al aprofondîs grafie, gramatiche e storie dal Friûl e al è a disposizion a gratis, in version digiâl, su [www.arlef.it](http://www.arlef.it) e [www.filologicafriulana.it](http://www.filologicafriulana.it). Il plan de opare al previôt la realizazion di 3 volums: ognidun al corispuint a di une anualitât dal cors (I, II e III) e al è spartît in 12 unitâts didatichis. Ogni manuâl al è organizât su la progression e su la gradualitât intal disvilup des abilitâts linguistichis.

## Friûl simpri plui european: la ARLeF intal diretîf dal NPLD

Il Friûl e il furlan a son simpri di plui protagonisti in Europe: la Agenzie Regionâl pe Lenghe Furlane e je jentrade intal diretîf de Rêt europeane par promovi la diversitât linguistichis (NPLD), che e à la sô sede a Brussel. E je la prime volte che la comunitât linguistichis furlane e à une incarghe di nivel european intune organizazion pe tutele des lenghis minoritariis. A rapresentâ la ARLeF (dal 2014 componente, cu la Regjon F-VJ, de Rêt) al sarà il so diretôr, William Cisilino, nomenât ae unanimitât, tant che vice di Agustina Vilaret González, segretarie gjenerâl pe politiche linguistichis dal guvier des Isulis Baleârs (Spagne) e gnove presidente de rê pai prossims trê agns. La NPLD e je une rêt paneuropeane

ative intal setôr de politiche e de planificazion linguistichis increditade li des principâls istituzions de Union Europeane. La rêt internazionâl e je costituide di diviers organisims statâi e regionâi, in plui di universitâts, associazions e organizacions no governativis che a son ativas intal setôr dal multilinguism. L'obietîf primari de NPLD al è chel di inressi, a nivel european, la cussience in cont de impuartance de diversitât linguistichis, valorizantle tant che oportunitât e strument di fonde pal disvilup personâl, sociâl e economic de Europe.

